

# Stgaffir in paradis per viandants

Il deputà Ilario Bondolfi vul promover il viandar en il chantun Grischun

■ **(anr/ac) Il deputà Ilario Bondolfi (pcd Curia) ha defini en ina incumbensa parlamentara il med adattà per dar dapli schlantsch al turissem grischun. El pretenda engaschi finanziel da la regenza per promover il chantun Grischun sco paradis per viandants.**

Gronda fidanza na paran il deputà *Ilario Bondolfi* e ses cunsegnaders betg dad avair vers Grischun Vacanzas e vers l'Uffizi chantunal per economia e turissem. El propona numnadain a la regenza via incumbensa parlamentara dad instalar ina gruppa da lavur ordaifer las duas instituziuns ed alimentar ella cun ils meds finanziels necessaris. Per instradar e promover il chantun Grischun sco paradis per viandantas e viandants ed uschia far frunt a la digren cuntinuada da las pernottaziuns en il chantun Grischun. Instradar quellas mesiras vul il deputà cun la finamira ch'il term viandar vegnia associà reflexamain cun il chantun Grischun. Il deputà è da l'avis ch'i basegna in pèr milliuns francs per onn per promover quel reflex. Bondolfi ha fatg attent a l'enorm potenzial dal viandar en ed ordaifer la Svizra. El ha menziunà examinaziuns scientificas che conferman che la mesadad da la populaziun svizra indicheschia l'ir a pe sco la pli apprezzada activitad dal temp liber. En la Germania saja la cumpart dals viandants incarnads anc pli auta, scriva il deputà en sia incumbensa. La finamira da quels viandants saja ina cuntrada intacta e da quella cuntrada possedia il chantun Grischun en abundanza. La gruppa creschenta da viandants saja ina expressiun dad ina gronda part da la populaziun vers

ina vita durabla. Bondolfi è da l'avis che viandar saja il fundament per las ulteriuras activitads turisticas e che viandantas e viandants turnian en il chantun Grischun per ulteriuras activitads sportivas e turisticas. Il deputà e ses cunsegnaders èn vinavant da l'avis ch'il viandar vegnia propagà memia pauc actualmain. El scri-

va da l'impressiun che l'uffizi d'economia e turissem sa sprovia bain da dar dumogn a las sfidas actualas. Els sajan dentant serrads en lur roda dal furmanter cun la finamira da producir dapli dal sumegliant ed enconuschent. I dovria uss ideas concretas per terminar la spirala negativa dal turissem.



**Il deputà Ilario Bondolfi (pcd Cuira) pretenda da la regenza dapli engaschi a favur dal viandar per sa profilar sco paradis dals viandants.**